

* * *

ԱՐԵՎԱՆՈՅՍ ՄԻԻԹԱՐԵԱՆՑԻ

Ողջոյն ձեզ, ողջոյն, հայրենի լեռներ,
Շատ տարի առաջ, ինչպէս և այսօր,
Ձեր հրսկայական ձիւնոտ կատարներ
Փայլում են պայծառ. թէև ալևոր
Դուք նոյնպէս հըսարտ, անշարժ, անսասան
Նայում էք հիմա բարձր հօրիզօնից,
Որպէս և այնօր, երբ լուռ և անձայն
Գընում էի ես սիրած աշխարհից:

Ողջոյն ձեզ, կանաչ արտ ու արօտներ,
Կապոյտ ու կարմիր հանդերձով կոկաճ
Ժըպտում են ձեր մէջ գարնան ծաղիկներ,
Նոյնպէս գեղեցիկ, որպէս և առաջ.
Նոյն ականակիտ հոսում է գետակ,
Նոյն փըրփըրալից ալիքն են վազում,
Եւ քաղցր է նոյնպէս նոցա եղանակ,
Որպէս և վաղուց անցած օրերում:

Ահա նաև դուք... Ողջոյն ձեզ, ողջոյն,
Փռքրիկ, փոշելից տուն ու փողոցներ.
Ձեր մէջ անցկացրած ուրախ մանկութիւն
Ձարթնում է կըրկին. ձեր կոպիտ քարեր,
Ձեր հողն ու փոշին ես դեռ չեմ փոխել
Աշխարհիս բոլոր հարըստութեան հետ,

Երազներին մէջ ես ձեզ եմ տեսել,
Ես ձեզ եմ սիրել Հայրենիքիցս յետ:

Դուք նորին էք կրկին. նոյնպէս ոլորած
Կորչում է փողոց զառիվայրի մէջ,
Նոյնպէս կանգնած են և յետ ու առաջ
Տըների շարքերն երկար ու անվերջ.
Ո՛րքան քաղցր օրեր, խաղեր մանկական
Կապած են ձեզ Հետ Հոգուս խորքերում.
Ողջոյն ձեզ կրկին.— առաջալ նըման
Ես ձեզ Հիւրընկալ, ուրախ եմ տեսնում:

Բայց ո՛ւր ես արգեօք, Հայրենի տընակ.
Միթէ կուրացան յանկարծ իմ աչեր,
Միթէ երազում ես քո փոխանակ
Տեսնում եմ միայն ցիրուցան քարեր.
Եւ ո՛ւր է ծերուկս... ո՛ւր են մեղմաձայն
Մի Հատիկ որդու Համար մըրմունջներ...
Ա՛խ, ողջոյն, ողջոյն, մոռացած տապան,
Ողջոյն ձեզ, քանդւած, աւերւած պատեր: